

四庫全書

史部

欽定四庫全書

史部

尚史卷九十五  
六

檢討臣翁樹培覆勘

總校官檢討臣何思鈞

欽定四庫全書

尚史卷九十五

志三

鑲白旗漢軍李錯撰

五行志

夫天人者一於氣交者也聖人在上仁生義殺合德天地則雷動風化火蒸水潤陽無凌陰陰無冒陽萬物以華而四氣順焉謂之至治其或逞欲縱慝紊蔑綱紀鬱抑否塞坐涌旁達則淫沴之氣作而為妖星辰錯行毛

羽生孽洪範所謂狂而恒雨僭而恒暘豫而恒燠急而恒寒捷於景響也然人作於下天變於上皆已事之徵非前事之罰乎劉向曰妖孽應行而自見非見而為害也歆曰經書災而不記其故蓋吉凶亡常隨行而成禍福也然則高明之家槌事應以實之梓慎裨謔顧或與焉夫大札緩報庶青隱符不亦難言已乎要之天變修德地變修刑敬威與怒克其在已而已紀其變削其兆述五行志

惟十有三祀王訪于箕子王迺言曰烏疇箕子惟天陰  
隲下民相協厥居我不知其彞倫攸叙箕子迺言曰我  
聞在昔鯀殛洪水汨陳其五行帝乃震怒弗畀洪範九  
疇彞倫攸斁鯀則殛死禹乃嗣興天迺錫禹洪範九疇  
彞倫攸叙初一日五行次二曰羞用五事次三曰農用  
八政次四曰協用五紀次五曰建用皇極次六曰乂用  
三德次七曰明用稽疑次八曰念用庶徵次九曰嚮用  
五福威用六極

漢書此六十五字皆雜書本文劉向洪範傳次第之  
數禹加之龜文總三十八字劉歆洪範傳說用等亦  
禹所第叙龜文唯二十字

初一日五行五行一曰水二曰火三曰木四曰金五曰  
土水曰潤下火曰炎上木曰曲直金曰從革土爰稼穡  
傳曰田獵不宿飲食不享出入不節奪民農時及有姦  
謀則木不曲直棄法律逐功臣殺大子以妾為妻則火  
不炎上治宮室飾臺榭內淫亂犯親戚侮父兄則稼穡

不成好戰攻輕百姓飾城郭侵邊境則金不從革簡宗  
廟不禱祠廢祭祀逆天時則水不潤下

伏勝五行傳

次二曰羞用五事五事一曰貌二曰言三曰視四曰聽  
五曰思貌曰恭言曰從視曰明聽曰聰思曰睿恭作肅  
從作人明作哲聰作謀睿作聖休徵曰肅時雨若人時  
暘若哲時燠若謀時寒若聖時風若咎徵曰狂恒雨若  
僭恒暘若舒恒燠若急恒寒若蒙恒風若

傳曰貌之不恭是謂不肅厥咎狂厥罰恒雨厥極惡時

則有服妖時則有龜孽時則有雞翫時則有下體生上之病時則有青眚青祥惟金沴木言之不從是謂不人厥咎僭厥罰恒暘厥極憂時則有詩妖時則有介蟲之孽時則有犬豕時則有口舌之病時則有白眚白祥惟木沴金視之不明是謂不哲厥咎舒厥罰恒燠厥極疾時則有草妖時則羸蟲之孽時則有羊翫時則有目病時則有赤眚赤祥惟水沴火聽之不聰是謂不謀厥咎急厥罰恒寒厥極貧時則有鼓妖時則有魚孽時則有



承駝時則有耳病時則有黑眚黑祥惟火沴水思心之不審是謂不聖厥咎蒙厥罰恒風厥極凶短折時則有暗夜之妖時則有華孽時則有牛駝時則有心腹之病時則有黃眚黃祥時則有金木水火沴土

伏勝五行傳五

次五曰建用皇極

尚書

傳曰皇之不極是謂不建厥咎眊厥罰恒陰厥極弱時則有射妖時則有龍蛇之孽時則有馬駝時則有下人伐上之病時則有日月亂行星辰逆行

伏勝五行志

水不潤下

魯桓公元年秋大水

十三年夏大水

莊公七年秋大水亡麥苗

十一年秋宋大水

二十四年大水

宣公十年秋大水饑

成公五年秋大水

襄公二十四年秋大水

趙惠文王二十七年河水出大潦

顓事有知誅罰絕理厥災水其水也雨殺人以隕霜  
大風天黃饑而不損茲謂秦厥災水水殺人辟遏有  
德茲謂狂厥災水水流殺人已水則地生蟲歸獄不  
解茲謂追非厥水寒殺人追誅不解茲謂不理厥水  
五穀不收大敗不解茲謂皆陰解舍也王者于大敗  
誅首惡赦其衆不則皆凶陰氣厥水流入國邑隕霜

穀穀

京房  
易傳

火不炎上

魯桓公十四年八月壬申御廩災

劉向洪範傳夫人八妾所舂米之臧以奉宗廟者劉  
歆洪範傳公所親耕藉田以奉粢盛者

莊公二十年夏齊大災

僖公二十年五月己巳西宮災

左傳公宮也穀梁慙公宮董舒仲繁露小寢夫人之

宮

宣公十六年夏成周宣榭火

榭者所以藏樂器宣其名也左傳人火曰火榭者講武之坐屋

成公三年二月甲子新宮災

穀梁宣宮

襄公九年春宋災

三十年五月甲午宋災

昭公六年六月丙戌鄭災

九年夏四月陳災

十八年五月壬午宋衛陳鄭災

定公二年五月雉門及兩觀災

哀公三年五月辛卯桓僖宮災

四年六月辛丑亳社災

君不思道厥妖火燒宮

京房  
易傳

稼穡不成

魯莊公七年秋大水亡麥苗

二十八年冬大亡麥禾

襄公二十四年大饑

趙幽繆王六年大饑

秦始皇帝三年歲大饑

十九年大饑

水旱當書不書水旱而曰大亡麥禾者土氣不養稼

穡不成者也

劉向洪範傳

金不從革

魯昭公八年春石言于晉

秦獻公十八年雨金于櫟陽

晉平公問于師曠對曰石不能言神或馮焉作事不時怨讟動于民則有非言之物而言今宮室崇侈民力雕盡怨讟並興莫信其性石之言不亦宜乎

左傳

金石同類是為金不從革失其性也

劉歆洪範傳

木不曲直



魯成公十六年正月雨水冰

冰者陰之盛而水滯者也木者少陽貴臣卿大夫之  
象也此人將有害則陰氣脅木木先寒故得雨而冰  
也

劉向洪  
範傳

恒雨

以下貌不  
恭之咎

魯隱公九年三月癸酉大雨震電庚辰大雨雪

僖公二十九年大雨雹

昭公三年大雨雹

服妖

魯閔公二年晉獻公使太子申生帥師公衣之偏衣佩之金玦後四年申生以讒自殺

鄭子臧好聚鵲冠鄭文公惡之使盜殺之

近服妖也

劉向洪範傳

行不順厥咎人奴冠天下亂辟無適妻子拜又曰君

不正臣欲篡厥妖狗冠出朝門

京房易傳

雞旼

周景王時大夫賓起見雄雞自斷其尾

近雞翫也

劉向洪範傳

有始無終厥妖雄雞自齧斷其尾又曰賢者居明夷之世知時而傷或衆在位厥妖雞生角雞生角時主獨又曰婦人顓政國不靜牝雞雄鳴主不榮

京房易傳

青眚青祥

魯宣公七年正月鼯鼠食郊牛角改卜牛又食其角定公十五年鼯鼠食郊牛牛死

哀公元年正月鼯鼠食郊牛

近青祥亦牛旣也不敬而備霽之所致也

劉向洪範傳

祭天不慎厥妖鼯鼠齧郊牛角又曰子不子鼠食其郊牛又曰誅不原情厥妖鼠舞門臣私祿罔辟厥妖

鼠巢

京房易傳

鼯鼠食郊牛養牲不謹也

董仲舒繁露

金沴木

魯文公十三年太室屋壞

上下咸諄厥妖城門壤

京房  
易傳

恒暘

以下言不  
從之咎

魯莊公三十一年冬不雨

僖公二年冬十月不雨

三年春正月不雨夏四月不雨六月雨

二十一年夏大旱

文公二年自十有二月不雨至于秋七月

十年自正月不雨至于秋七月

十三年自正月不雨至于秋七月

宣公七年秋大旱

襄公五年秋大雩

八年九月大雩

二十八年八月大雩

昭公三年八月大雩

六年九月大雩

十六年九月大雩

二十四年八月大雩

二十五年七月上辛大雩季辛又雩旱甚也

定公十年九月大雩

秦始皇帝十二年天下大旱六月至八月乃雨

大旱也其夏旱雩祀謂之大雩不傷二穀謂之不雨

劉向洪  
範傳

欲德不用茲謂張厥災荒旱也其旱陰雲不雨變  
而赤因而除師出過時茲謂廣其旱不生上下皆蔽

茲謂隔其旱天赤三月時有電殺飛禽上緣求妃茲  
謂僭其旱三月大溫亡雲居高臺府茲謂犯陰侵陽  
其旱萬物根死數有火災庶位踰節茲謂僭其旱澤

物枯為火所傷

京房  
易傳

詩妖

宣王時童女謠曰縻弧箕服實亡周國有夫婦賣是罍  
者宣王聞之使執而戮之逃于道見妖子哀而收之是  
為褒姒後申侯殺幽王驪山下擄褒姒



晉獻公時童謡曰丙之辰龍尾伏辰初服振振取虢之  
旗鶉之賁賁天策焞焞火中成軍虢公其犇冬十二月  
丙子朔晉滅虢虢公醜犇周

晉惠公時童謡曰恭大子更葬兮後十四年晉亦不昌  
昌迺在兄公後為秦所獲立十四年而死晉人更立其  
兄重耳

文成之世童謡曰鶉之鴝之公出辱之鶉鴝之羽公在  
外野往饋之馬鶉鴝踈踈公在乾侯微裳與襦鶉鴝之

巢遠哉搖搖禍父喪勞宋父以驕鸛鵒鸛鵒往歌來哭  
至昭公時鸛鵒來巢公攻季氏敗出奔乾侯八年死于  
外昭公名裯公子宋立是為定公

毛蟲之孽

魯莊公十七年冬多麋

麋色青近青祥麋之為言迷也蓋牝獸之淫者

劉向洪範

傳

毛蟲之孽為災

劉歆洪範傳

廢正作淫大不明國多廢又曰震遂泥厥咎國多廢

京房  
易傳

### 犬豕

魯襄公十七年十一月甲午宋國人逐獬豸狗獬狗入于  
華臣氏國人從之臣懼遂犇陳先是臣兄閭為宋卿閭  
卒臣使賊殺閭家宰遂就其妻宋平公欲逐之左師向  
戌曰不如益之乃止臣內不自安故犬豕至

執政失下將害之厥妖狗生角君子苟免小人陷之

厥妖狗生角夫婦不嚴厥妖狗與承交茲謂反德國

有兵草

京房  
易傳

白眚白祥

敬王二年十月癸酉王子朝以成周之寶圭沈于河幾  
以獲神助津人得之河上陰不佞取將賣之則為石後  
二年子朝犇楚而死

秦始皇帝三十六年鄭客從關東來至華陰望見素車  
白馬從華山上下知其非人道住止而待之遂至持璧

與客曰為我遺錫池君今年祖龍死忽不見璧即始皇  
帝二十八年過江所沈璧也

泰山之石顛而下聖人受命人君虜又曰石立如人  
庶士為天下雄立于山同姓平地異姓立于水聖人  
于澤小人前樂後憂厥妖雨羽又曰邪人進賢人逃

天雨毛

京房  
易傳

木沴金

威烈王二十三年九鼎震

恒煥

以下視不  
明之咎

魯桓公十五年春亡水

成公元年二月亡水

襄公二十八年春亡水

祿不遂行茲謂欺厥咎與雨雪四至而溫臣安祿樂  
逸茲謂亂與而生蟲知罪不誅茲謂舒其與夏則暑  
殺人冬則物華實重過不誅茲謂亡徵其咎當寒而

與六日也

京房  
易傳

草妖

殷太戊時毫有祥桑穀共生于朝一暮大拱

二木合生不恭之罰

孔安國傳

桑猶喪也穀猶生也殺生之秉失而在下近草妖也

劉向洪範傳

魯僖公三十三年冬十二月隕霜不殺草李梅實

秦獻公十六年桃冬花

周十二月今十月也十月隕霜而不能殺草此君誅

不行舒緩之應也李梅當剥落反華實近草妖也

劉向

洪範傳

李梅實臣下彊也

董仲舒  
繁露

枯楊生梯枯木復生人君亡子王德衰下人將起則  
有木生為人狀棄正作淫厥妖木斷自屬妃后有顓  
木仆反立斷枯復生天辟惡之君吝于祿信衰賢去

厥妖天雨草

京房  
易傳

羽蟲之孽



殷高宗時祭成湯有蜚雉登鼎耳而雊

魯昭公二十五年夏有鸛鵒來巢

哀公時有隼集于陳廷而死桎矢貫之石罅長尺有咫  
秦文公時陳倉人獵得獸若羆不知名牽以獻之逢二  
童子童子曰此名為媚常在地中食死人腦即欲殺之  
拍捶其首媚亦語曰二童子名陳寶得雄者王得雌者  
霸陳倉人逐二童子化為雉雌止陳倉北坂為石秦祠  
之

鸛鶴白羽旱之祥也穴居而好水黑色為主急之應也隼近黑祥貪暴類也矢貫之近射妖也死于廷國亡表也

劉向洪範傳

鸛鶴羽蟲之孽其色黑又黑祥也視

不明聽不聽之罰也

劉歆洪範傳

逆親親厥妖白黑鳥闕于國專征刼殺厥妖鳥鵲闕辟退有德厥咎狂厥妖水鳥集于國中人君暴虐鳥焚其舍賊臣在國厥咎燕生爵諸侯銷一曰生非其類子不嗣世

京房易傳隼入射妖今八羽蟲之孽

羊甌

魯定公時季桓子穿井得土缶中得蟲若羊

赤眚赤祥

魯襄公時宋有生女子赤而毛棄之隄下宋平公母共姬之御者見而收之因名曰棄長而美好納之平公生子曰佐後宋臣伊戾讒太子痤而殺之

時則火災赤眚之明應也

劉向洪範傳

尊卑不別厥妖女

生赤毛又曰歸獄不解茲謂追非厥咎天兩血茲謂

不親民有怨心不出三年無有宗人又曰佞人祿功

臣僂天雨血

京房易傳

恒寒

以下聽不聽之咎

魯桓公八年冬十月雨雪

僖公十年冬十月大雨雪

昭四年正月大雨雪

定公元年十月隕霜殺菽

趙成侯二年六月雨雪

秦始皇帝九年四月寒凍有死者

二十一年大雨雪深二尺五寸

雨雪雹隕霜殺殺皆常寒之罰

劉向洪範傳

夏雨雪戒臣為亂又曰有德遭險茲謂逆命厥異寒  
誅過深當與而寒盡六日亦為雹害正不誅茲謂養  
賊寒七十二日殺蜚禽道人始去茲謂傷其寒物無  
霜而死涌水出戰不量敵茲謂辱命其寒雖雨物不  
茂聞善不予厥咎聾又曰興兵妄茲謂亡法厥災霜

夏殺五穀冬殺麥誅不原情茲謂不仁其霜夏先大  
雷風冬先雨迺隕霜有芒角賢聖遭害其霜附木不  
下地佞人依刑茲謂私賊其霜在草根土隙間不教  
而誅茲謂虐其霜反在草下

京房  
易傳

鼓妖

魯僖公三十二年十二月己卯晉文公卒庚辰將殯于  
曲沃出絳柩有聲如牛

近鼓妖也喪凶事聲如牛怒象也

劉向洪  
範傳

秦始皇帝五年冬雷

秦二世元年天無雲而雷

令不修本下不安金母故自動若有音

京房  
易傳

魚孽

秦始皇帝八年河魚大上

衆逆同志厥妖河魚逆流上又曰海數見巨魚邪人

進賢人疎

京房  
易傳

介蟲之孽

魯桓公五年秋螽

僖公十五年八月螽

文公三年秋雨螽于宋

八年十月螽

宣公六年八月螽

十五年秋螽

襄公七年八月螽

哀公十二年十二月螽



十三年九月螽十二月螽

宣公十五年冬螽生

貪虐取民則螽介蟲之孽與魚同占螽蛸蠹之有翼

者食穀為災黑膏也

劉歆洪範傳

螽蟊始生也羸蟲之孽

劉向洪範傳

豕豨

魯莊公八年齊襄公田于貝邱從者曰公子彭生也公怒射之豕人立而唬公懼墜車傷足喪屨

衆心不安君政厥妖承入居室

京房  
易傳

火沴水

靈王二十二年穀洛水鬪將毀王宮王擁之

秦武王三年渭水赤三日

秦昭王三十四年渭水赤三日

近火沴水也

劉向洪  
範傳

天子弱諸侯力政厥異水鬪君湏于酒淫于色賢人

潛國家危厥異流水赤

京房  
易傳

恒風

以下思心  
不審之咎

成王二年秋大熟未獲雨大雷電以風禾盡偃大木斯拔

魯僖公十六年正月六鷄退蜚過宋都

左氏傳曰風也經以見者為文故記退蜚傳以實應  
著言風常風之罰也

劉敞洪  
範傳

距諫自彊茲謂卻行厥異鷄退飛適當黜則鷄退飛  
又曰潛龍勿用衆逆同心至德迺潛厥異風其風也

行不解物不長兩小而傷政悖德隱茲謂亂厥風先  
風也雨大風暴起發屋折木守義不進茲謂耄厥風  
與雲俱起折五穀莖臣易上政茲謂不順厥風大焱  
發屋賦歛不理茲謂禍厥風絕經緯止即溫溫即蟲  
侯專封茲謂不統厥風疾而樹不搖穀不成辟不思  
道利茲謂無澤厥風不搖木旱無雲傷禾公常于利  
茲謂亂厥風微而溫生蟲蝗害五穀棄正作淫茲謂  
惑厥風溫螟蟲起害有益人之物侯不朝茲謂叛厥

風無恒地變赤而殺人

京房  
易傳

暗夜之妖

魯桓公十五年九月己卯晦震夷伯之廟

晦暝也震雷也晦暝雷擊其廟所謂夜妖也

劉向洪  
範傳

春秋及朔言朔及晦言晦月晦也

劉歆洪  
範傳

羸蟲之孽

魯隱公五年秋螟

八月九月螟

莊公六年秋螟

十八年秋有蜮

二十九年有蜚

臣安祿茲謂貪厥災蟲蟲食根德無常茲謂煩蟲食  
葉不絀無德蟲食本與東作爭茲謂不時蟲食節蔽  
惡生孽蟲食心又曰忠臣進善君不試厥咎國生蜮

京房  
易傳

蜮生南越越男女同川淫女為主亂氣所生在水旁

能射人近射妖死亡之象也蜚色青近青眚也非中

國所有南越盛暑男女同川澤淫風所生

劉向洪範傳

蜮盛暑所生非自越來蜚負蟄也性不食穀食穀為

災

劉敞洪範傳

牛旤

魯宣公三年郊牛之口傷改卜牛牛死

秦文公時雍南山有梓樹使人被髮以朱絲繞樹伐樹  
斷中有青牛出走入豐水中

秦孝文王五年游胸衍有獻五足牛者

興徭役奪民時厥妖牛生五足

京房  
易傳

心腹之疴

景王鑄無射鐘冷州鳩曰王其以心疾死乎明年以心  
疾崩

黃胄黃祥

春秋無其應

聞善不與茲謂不知厥異黃厥咎孽厥災不嗣黃者



日上黃光不散如火然有黃濁氣四塞

京房  
易傳

金木水火沴土

夏末伊雒竭商末河竭

幽王二年周三川皆震是歲三川竭岐山崩

魯文公九年九月癸酉地震

襄公十六年五月甲子地震

昭公十九年五月己卯地震

敬王元年八月丁酉南宮極震己未魯地震

哀公二年四月甲午地震

僖公十四年秋八月辛卯沙鹿崩

晉地山名河上邑

成公五年夏梁山崩癰河三日不流晉君帥羣臣而哭之迺流

趙幽繆王五年代地大動自樂以西北至平陰屋太半壞地坼東西百三十步

秦始皇帝十五年地震

十七年地震

伯陽甫曰陽伏而不能出陰迫而不能升于是地震

陽失其所而填陰也陽失而在陰原必塞塞必竭川

竭必山崩山崩川竭亡之徵也

史記

陽失在陰謂火氣

來煎枯水故川竭也山川連體下竭上崩事勢然也

以為金木水火沴土者也

劉向洪範傳

君臣相背厥異名水絕又曰臣事雖正專必震其震

于水則波于木則搖于屋則瓦落大經在辟而易臣

茲謂陰動厥震搖政宮大經搖政茲謂不陰厥震搖

山山出涌水嗣子無德專祿茲謂不順厥震動邱陵  
涌水出又曰小人剥廬厥妖山崩茲謂陰乘陽弱勝

彊

京房  
易傳

常陰

以下皇極  
不建之咎

春秋亡其應

有蜺蒙霧霧上下合也蒙如塵雲蜺日旁氣也后妃  
有專蜺再重赤而專至衝旱妻不壹順黑蜺四背又  
白蜺雙出日中妻以貴高夫茲謂擅陽蜺四方日光

不揚解而溫內取茲謂禽蛻如禽在日旁以尊降妃  
茲謂薄嗣蛻直而塞六辰迺除夜星見而赤女不變  
始茲謂乘夫蛻白在日側黑蛻果之氣正直妻不順  
正茲謂擅陽蛻中窺貫而外專夫妻不嚴茲謂媒蛻  
與日會婦人擅國茲謂頃蛻白貫日中赤蛻四背適  
不答茲謂不次蛻直在左蛻交在右取于不專茲謂  
危嗣蛻抱日兩未及君淫外茲謂亡蛻氣左日交于  
外取不達茲謂不知蛻日奪明而大溫溫而雨尊卑

不別茲謂蝶蛻三出三已三辰除除則日出且雨臣  
私祿及親茲謂罔辟厥異蒙其蒙先大溫已蒙起日  
不見行善不請于上茲謂作福蒙一日五起五解辟  
不下謀臣辟異道茲謂不見上蒙下霧風三變而俱  
解立嗣子疑茲謂動欲蒙赤日不明德不序茲謂不  
聰蒙日不明溫而民病德不試空言祿茲謂主竊臣  
天蒙起而白君樂逸人茲謂放蒙日青黑雲夾日左  
右前後行過日公不任職茲謂怙祿蒙三日又大風

五日蒙不解利邪以食茲謂閉上蒙大起白雲如山  
行蔽日公懼不言道茲謂蔽下蒙大起日不見若雨  
不雨至十二日解而有天雲蔽日祿生于下茲謂誣  
君蒙微而小雨已乃大雨下相攘善茲謂盜明蒙黃  
濁下陳功求于上茲謂不知蒙微而赤風鳴條解復  
蒙下專刑茲謂分威蒙而日不得明大臣厭小臣茲  
謂蔽蒙微日不明若解不解大風發赤雲起而蔽日  
衆不惡惡茲謂蔽蒙尊卦用事三日而起日不見漏

言亡喜茲謂下厝用蒙微日無光有雨雲雨不降廢  
忠惑佞茲謂亡蒙天先清而暴蒙微而日不明有逸  
民茲謂不明蒙濁奪日光公不任職茲謂不絀蒙白  
三辰止則日青青而寒寒必雨忠臣進善君不試茲  
謂過蒙先小雨雨已蒙起微而日不明衆惑在位茲  
謂覆國蒙微而日不明一溫一寒風揚塵知佞厚之  
茲謂痺蒙甚而溫君臣故弼茲謂悖厥災風雨霧風  
拔木亂五穀已而大霧庶正蔽惡茲謂生孽災厥異



霧此皆陰雲之類云

京房  
易傳

### 射妖

宣王殺杜伯而無罪王會諸侯田于圃中日中杜伯起

于道左射王中心而死

志無之今  
入射妖

### 龍蛇之孽

夏后氏之衰有二龍止于夏廷而言予褒之二君也夏  
帝卜殺之去之止之莫吉卜請其殽而藏之乃吉于是  
布幣策而告之龍亡而殽在乃匱去之夏亡傳匱殷周

三代莫發至厲王末發之釁流于廷不可除王使婦人  
嬴而譟之釁化為玄黿入後宮處妾遇之而孕生子懼  
而棄之後有夫婦鬻厥孤其服之器者見處妾所棄妖  
子聞其夜號哀而收之遂亡奔褒褒人有罪入妖子以  
贖是為褒姒

魯昭公十九年龍鬪于鄭時門之外洧淵

衆心不安厥妖龍鬪有德遭害厥妖龍見井中行刑

暴惡黑龍從井出

京房  
易傳

魯莊公八年有內蛇與外蛇闔于鄭南門中內蛇死  
文公十六年夏有蛇自泉宮出入于國如先君之數

立嗣子疑厥妖蛇居國門闕

京房  
易傳

泉宮在園中蛇從宮出象宮將不居近蛇孽也

劉向  
洪範

傳

馬駝

魯定公十年宋公子地有白馬駝公嬖向魋取而朱其  
尾鬣以予之公子地公弟辰入于蕭以叛

秦孝公二十一年有馬生人

秦昭王二十年牡馬生子而死

皆馬馱也諸畜生非其類子孫必有非其姓者

劉向洪範

傳

方伯分威厥妖牡馬生子亡天下諸侯相伐厥妖馬  
生人臣易上政不順厥妖馬生角茲謂賢士不足又

曰天子親伐馬生角

京房易傳

下人伐上之病

魯文公十一年敗狄于鹹長狄兄弟三人一者之魯一者之齊一者之晉皆殺之身橫九畝斷其首而載之眉見于軾

秦始皇帝二十六年有大人長五丈足履六尺皆夷狄服凡十二人見于臨洮

君暴亂疾有道厥妖長狄入國又曰豐其屋下獨苦

長狄生世主虜

京房  
易傳

魯宣公八年晉人獲秦謀殺諸絳市六日而蘇

魏襄王十三年有女子化為丈夫

人變屬黃祥屬羸蟲之孽一曰天地之性人為貴人

變皆屬皇極下人伐上之病

劉歆洪範傳

幹父之蠱有子考亡咎子三年不考父道思慕不皇亦重見先人之非不則為私厭妖人死復生一曰至陰為陽下人為上睽孤見豕負塗厭妖人生兩頭下相攘善妖亦同人若六蓄首目在下茲謂亡上正將變更凡妖之作以譴失正各象其類二首下不一也

足多所任邪也足少下不勝任或不任下也凡下體  
生于上不敬也上體生于下媒瀆也生非其類淫亂  
也人生而大上速成也生而能言好虛也羣妖推此  
類不改乃成凶也又曰冢宰專政厥妖人生角妖言

動衆路將亡人司馬死

京房  
易傳

魯莊公三十二年秋七月有神降于莘神居莘六月虢  
公使祝應宗區史闕享焉神賜之土田史闕曰虢其亡  
乎國將興聽于民將亡聽于神

僖公十年秋狐突適下國遇大子大子使登僕而告之  
曰夷吾無禮余得請于帝矣將以晉畀秦秦將祀余對  
曰臣聞之神不歆非類民不祀非族君祀無乃殄乎且  
民何罪失刑乏祀君其圖之君曰諾吾將復請七日新  
城西偏將有巫者而見我焉許之遂不見及期而往告  
之曰帝許我罰有罪矣敝于韓

志無之今  
八人變

日月亂行

夏仲康五年九月朔日有食之



周幽王六年十月辛卯朔日有食之

魯隱公三年二月己巳日有食之

桓公三年七月壬辰朔日有食之既

十七年十月朔日有食之

莊公十八年三月日有食之

二十五年六月辛未朔日有食之

二十六年十二月癸亥朔日有食之

三十年九月庚午朔日有食之

僖公五年九月戊申朔日有食之

十二年三月庚午朔日有食之

十五年五月日有食之

文公元年二月癸亥日有食之

十五年六月辛丑朔日有食之

宣公八年七月甲子日有食之

十年四月丙辰日有食之

十七年六月癸卯日有食之

成公十六年六月丙寅朔日有食之

十七年十二月丁巳朔日有食之

襄公十四年二月乙未朔日有食之

十五年八月丁巳日有食之

二十年十月丙辰朔日有食之

二十一年九月庚戌朔日有食之

十月庚辰朔日有食之

二十三年二月癸酉朔日有食之

二十四年七月甲子朔日有食之既

八月癸巳朔日有食之

二十七年十二月乙亥朔日有食之

昭公七年四月甲辰朔日有食之

十五年六月丁巳朔日有食之

十七年六月甲戌朔日有食之

二十一年七月壬午朔日有食之

二十二年十二月癸酉朔日有食之

二十四年五月乙未朔日有食之

三十一年十二月辛亥朔日有食之

定公五年三月辛亥朔日有食之

十二年十一月丙寅朔日有食之

十五年八月庚辰朔日有食之

哀公十四年五月庚申朔日有食之

秦昭襄王六年日食晝晦

秦莊襄王三年四月日食

凡日食不以晦朔者曰薄人君誅將不以理或賊臣將暴起日月雖不同宿陰氣盛薄日光也又曰亡師茲謂不御厥異日食其食也既並食不一處誅衆失理茲謂生叛厥食既光散縱畔茲謂不明厥食先大雨三日雨除而寒寒即食專祿不封茲謂不安厥食既先日出而黑光反燭君臣不通茲謂亡厥食三既同姓上侵茲謂誣君厥食四方有雲中央無雲其日大寒公欲弱主位茲謂不知厥食中白青四方赤食

已地震諸侯相侵茲謂不承厥食三毀三復君疾善  
下謀上茲謂亂厥食既先雨雹殺走獸殺君獲位茲  
謂逆厥食既先雨風折水日赤內臣外鄉茲謂苛厥  
食食且雨地中鳴冢宰專政茲謂因厥食先大風食  
時日居雲中四方亡雲伯正越職茲謂分威厥食日中  
分諸侯爭美于上茲謂泰厥食日傷月食半天營而  
鳴賦不得茲謂竭厥食星隨而下受命之臣專征云  
試厥食雖侵光猶明若文王臣獨誅紂矣小人順受

命者征其君云殷厥食五色至大寒隕霜若紂臣順  
武王而誅紂矣諸侯更制茲謂叛厥食三復三食食  
已而風地動適讓庶茲謂生欲厥食日失位光晦晦  
月形見酒亡節茲謂荒厥食乍青乍黑乍赤明日大  
雨發霧而寒凡食二十占其形二十有四改之輒除  
不改三年三年不改六年六年不改九年又曰美不  
上人茲謂上弱厥異日白七日不溫順亡所制茲謂  
弱日白六十日物亡霜而死天子親伐茲謂不知日



白體動而寒弱而有任茲謂不亡日白不溫明不動辟讐  
公行茲謂不伸厥異日黑大風起天無雲日光暝不難上政  
茲謂見過日黑居仄大如彈丸辟不聞道茲謂亡厥異日赤  
祭天不順茲謂逆厥異日赤其中黑聞善不予茲謂失知  
厥異日黃色不虛改形不虛毀觀日之五變足以監矣又曰  
君弱婦彊為陰所乘則月並出晦而月見西方謂之朏朔而  
月見東方謂之仄慝則侯王其肅朏則侯王其舒  
京房  
易傳  
朏者疾也君舒緩則臣驕慢故日行遲月行疾也仄

慝者不進之意君肅急則臣恐懼故日行疾月行遲  
也不舒不急以正失之者食朔日

劉向洪範傳

舒者侯王展意顯事臣下促急月行疾肅者侯王縮  
胸不任事臣下弛縱月行遲當春秋時侯王縮胸不  
任事故食二日仄慝者十八食晦舊朏者一此其效

也此皆謂日月亂行者也

劉歆洪範傳

### 星辰逆行

魯文公十四年七月有星孛于北斗

魯昭公十七年冬有星孛于大辰

齊景公三十二年十二月彗星見

魯哀公十三年冬十一月有星孛于東方

魯哀公十四年有星孛

魯莊公七年四月辛卯夜恒星不見夜中星隕如雨

魯僖公十六年正月朔隕石于宋五是月六鵲退飛過

宋都

魏惠王十二年彗星見星墜有聲

秦昭襄王二年彗星見

四年彗星見

十一年彗星見

始皇帝七年彗星先出東方見北方五月見西方己而彗星復見西方十六日

九年彗星見或竟天又見西方又見北方從斗以南八十日

十三年正月彗星見東方

三十三年明星出西方

三十六年有墜星下東郡至地為石或刻其石曰始皇帝死而地分

字者惡氣所生字字有所妨蔽闇亂不明之貌北斗大國象大辰心也心為明堂天子之象常星二十八宿人君之象衆星萬民之類也列星不見象諸侯微也衆星隕墜民失其所也

董仲舒  
繁露

君不任賢厥妖天雨星又曰距諫自彊茲謂卻行厥

異鵠退飛適當黜則鵠退飛

京房易傳

君臣亂于朝政令虧于外則上濁三光之精五星羸縮變色逆行甚則為孛又曰石陰類五陽數自上而隕陰而陽行欲高反下也石金同類色白近白祥也鵠水鳥六陰數退飛欲進反退也色青青祥也

劉向洪範

傳

斗天之三辰綱紀星也彗所以除舊布新也大辰房心尾也畫象中國夜象夷狄夜明故常見之星不見

象中國微也明雨與星隕兩變相成也

劉歆洪範傳

按戾德致災禍敗應應致之之繇不一應之之端亦不一也今削其應而著其繇蓋欲先事而樹防焉故附諸傳于羣類之末三代迄秦事亦隨類而增益之

尚史卷九十五



欽定四庫全書

尚史卷九十六

志四

鑲白旗漢軍李銍撰

地理志上

夫天地既判人智參通其建標荒度必有由來矣迨乎黃帝  
推分星次以定律度取象渙隨舟車致用而後畛域分焉顧  
時移世短書契闕如所可論擬唯唐虞而已至其九州分合  
山川附屬又易代而推移焉固可按籍而求也述地理志

地東西為廣南北為輪

家語山書曰地東西為緯南北為經

山為積德川為積刑高者為生下者為死邱陵為牡谿

谷為牝

周禮

東至於泰遠西至於邠國南至於濮鈎北至於祝栗謂  
之四極觚竹北戶西王母日下謂之四荒九夷八狄七  
戎六蠻謂之四海距齊州以南戴日為丹穴北戴斗極  
為空桐東至日所出為太平西至日所入為大蒙太平

之人仁丹穴之人智大蒙之人信空桐之人武

爾雅

禹使豎亥步自東極至於西極五億十選

選萬也

九千八

百步

淮南子禹使大章步自西極二億三萬三千

五百里七十五步詩合神霧天地東西二億三萬三

千里南北二億一千五百里天地相去一億五萬里

四海之內則東西二萬八千里南北二萬六千里出水

者八千里受水者八千里

山海經

諸子稱神農之王天下也地東西九十萬里南北八十  
五萬而他說稱日月所照三十五萬里考諸子所載神  
農之地過日月之表近為虛誕及少昊氏之衰九黎亂  
德其制無聞洎顓頊之所建帝嚳受定則孔子稱其地  
北至幽陵南暨交趾西蹈流沙東極蟠木日月所照莫

不底屬

帝王  
世紀

史記鄒衍云所謂中國者天下八十一分之一耳中  
國名曰赤縣內自有九州禹之九州是也不得為州

數中國外如赤縣州者亦謂之九州有裨海環如一區中者乃為一州如此者九都有大瀛海環其外此謂八極而天地際焉淮南子墜形之所載六合之間四極之內昭之以日月經之以星辰紀之以四時要之以太歲天地之間九州八極何謂九州東南神州曰農土正南次州曰沃土西南戎州曰滔土正西弇州曰并土正中冀州曰中土西北台州曰肥土正北濟州曰成土東北薄州曰隱土正東陽州曰申土

九州之大純方千里九州之外乃有八殛亦方千里  
自東北方曰大澤曰無通東方曰大渚曰少海東南  
方曰旻區曰元澤南方曰大夢曰浩澤西南方曰渚  
資曰丹澤西方曰九區曰帛澤西北方曰大夏曰海  
澤北方曰大冥曰寒澤凡八殛八澤之雲是雨九州  
八殛之外而有八紘亦方千里自東北方曰和邱曰  
荒土東方曰棘林曰桑野東南方曰大窮曰衆女南  
方曰都廣曰反戶西南方曰焦僥曰炎土西方曰金

邱曰沃野西北方曰一目曰沙所北方曰積冰曰委羽凡八絃之氣是出寒暑以合八正必以風雨八絃之外乃有八極自東北方曰方土之山曰蒼門東方曰東極之山曰開明之門東南方曰波母之山曰陽門南方曰南極之山曰暑門西南方曰編駒之山曰白門西方曰西極之山曰閭闔之門西北方曰不周之山曰幽都之門北方曰北極之山曰寒門凡八極之雲是雨天下八門之風是節寒暑八絃八殞八澤

之雲以雨九州而和中土太玄經九地一沙泥二澤  
浼三征崖四下田五中田六上田七下山八中山九  
上山博物志地以名山為輔佐石為之骨川為之脈草  
木為之毛土為之肉三尺以上為糞三尺以下為地  
又曰崑崙山北地轉下三千六百里有八元幽都方  
二十萬里地下有四柱四柱廣十萬里地有三千六  
百軸犬牙相舉尚書考靈曜地有四遊冬至地上北  
三萬里夏至地下南三萬里春秋二分則其中矣地



常動不止如人在舟舟行而人不覺按四柱四遊之說殊荒誕蓋地形如丸積氣浮之而四時太陽循乎赤道故至有南北是四柱不知地四遊不知天

泰山為東嶽

博物志泰山一曰天孫東方萬物始成故知人生命之長短五經通義一曰岱宗言王者受命易姓報功告成必於岱宗東方萬物始交代處

華山為西嶽

西山經華山一名太華山削成而四方

霍山為南嶽

荊州記衡山南嶽也至軒轅以瀉霍之山為其副故  
爾雅云霍山為南嶽蓋因其副焉郭璞註霍山在廬  
江郡潛縣別名天柱

恒山為北嶽

風俗通恒常也萬物伏北方有常亦謂常山白虎通  
北方為常山者陰終陽始其道常久故曰常山

嵩高為中嶽

白虎通中央居四方之中可高故曰嵩高

梁山晉望也

爾雅

周職方氏掌九州州有名山為地鎮冀州其鎮山曰霍山

註即太岳與廬江者別

并州其鎮山曰恒山東北幽州其鎮山曰醫無閭正東青州其鎮山曰沂山河東兗州其鎮山曰岱山河南豫

州其鎮山曰華山東南揚州其鎮山曰會稽正南荊州

其鎮山曰衡山正西雍州其鎮山曰嶽山

周禮

岱宗謂之泰山天柱謂之霍山華山謂之太華常山謂之恆山外謂之崕嵩岫嶺之衡山蜀山謂之崕山吳山謂之開山薄落謂之升頭土高有石山山產也石和也冢腫也嶽确也凡天下名山五千二百七十出銅之山四百六十有七出鐵之山三千六百九十崑崙虛有三山閭風板銅元圃其高萬一千一百一十里一十四步

二尺六寸

博雅

河圖崑崙之墟五城十二樓河水出焉大荒西經赤水之後黑水之前有山曰崑崙之丘有神人面虎身有尾水經崑崙墟在西北去嵩高五萬里地之中也其高萬一千里河水出其東北陬史記崑崙甚高三千五百餘里日月所相避隱為光明也博物志崑崙從廣萬一千里神物之所生聖人神仙之所集五氣雲氣五色流水其泉東南流入中國名為河

天下名山八三在夷五在中國華山首陽山太室山少

室山東太山此五山黃帝之常遊

史記

淮南子謂九山會稽泰山王屋首山太華岐山太行

羊腸孟門

陳有宛丘

郭璞註在陳郡陳縣

晉有潛丘

在太原晉陽縣

淮南有州黎丘

在壽春縣

天下有名丘五其三在河南二在河北

說者多以州多寃營

為河南潛敦為河北恐未足以當之殆別有傑大者五但未詳其名號耳

東陵隄南陵息慎

西陵威夷中陵朱滕北陵西隄鴈門是也陵莫大於加

陵梁莫大於渙梁墳莫大於河墳爾雅禹所謂八陵者也

魯有大野

郭璞註高平鉅野縣東北大澤

晉有大陸

鉅鹿北廣河澤

秦有楊陰

扶風汧縣西

宋有孟諸

梁國惟陽縣東北

楚有雲夢

南郡華容縣東南巴丘湖

吳

越之間有具區

吳縣南太湖

齊有海隅

海濱廣斥

燕有昭余祁

太原

鄆陵縣北九澤鄭有圃田

滎陽中牟縣西圃田澤

周有焦護

扶風池陽縣鄆中爾雅

禹所謂十數者也周有八數冀州楊紆并州昭餘祁幽

州獫狁青州望諸

即孟諸

兗州大野豫州圃田揚州具區

荊州雲夢雍州弦蒲

周禮

水自河出為澨

釋名作澨

濟為楚汶為澨洛為波漢為澨

淮為澨江為沱過為洵潁為沙汝為墳

博雅水自渭出為衆自汾出為派

江河淮濟為四瀆四瀆者發原注海者也河出崑崙虛

色白所渠并千七百一川色黃百里小曲一曲一直爾雅

江出岷山濟出王屋淮出桐栢

博物志

河之出崑崙虛也

山海經崑崙山有青河白河赤河黑河環其壻其白



水出其東北陬屈向東南流為中國河博雅崑崙墟  
赤水出其東南陬河水出其東北陬泮水出其西北  
陬弱水出其西南陬

東流潛行地下至規期山北流分為兩源一出葱嶺一  
出于闐其河復合河注蒲昌海復潛行地下南出積石  
山西南流又東廻入塞燉煌酒泉張掖郡南與洮河合  
過安定北地郡北流過朔方郡西又南流過五原郡南又  
東流過雲中西河郡東又南流過上都河東郡西而出

龍門

汾水從東入河  
東即龍門所在

至華陰潼關與渭水合又東廻

過砥柱

山名陝州東河  
北陝縣三縣界

及洛陽

孟津所在

至鞏縣與洛水合

成臯與濟水合又東北流過武德與沁水合至黎陽信

都

信都冀州  
絳水所在

鉅鹿之北遂分為九河又合為一河而入

海

經水

九河者徒駭太史馬頰覆鬴胡蘇簡絮鉤盤鬲津也

爾雅

河圖河導崑崙山東流千里至規期山北流千里至

積石山邠南千里入龍首山間抵龍門首南流千里

抵龍首至卷重山東流貫砥柱觸闕流山西距卷重  
山千里東至碓會東流至大岷山東流過洛水至大  
陸孝經援神契河者水之伯上應天漢呂氏春秋古  
龍門未開呂梁未發河出孟門大溢逆流名曰洪水  
禹乃決流疏河為彭澧之漳所活者千八百國桓譚  
新論四瀆之源河最高而長從高注下其流激迅故  
為平地災害

江之出岷山也其源若甕口可以濫觴在益州建寧滿

江縣潛行地底數里至楚都遂廣十里名為南江初在犍為與青衣水文水合至洛縣與洛水合東北至巴郡與涪水漢水白水合東至長沙與澧水沅水湘水合至江夏與沔水合至潯陽分為九道

潯陽記九江者白鳥江蟠江烏土江嘉靡江畎江浮江稟江提江茵江

東會於彭澤經蕪湖名為中江東北至南徐州名為北江而入海

山海經三江者大江南江北江也岷山大江所出岷  
山南江所出東注大江岨山北江所出東注大江  
按禹貢漢水出嶓冢其流東匯彭蠡又東為北江江  
水出岷山其流東迤北會於匯又東為中江孔安國  
註左合漢為北江會彭蠡為南江岷江居其中為中  
江書稱東為中江者明岷江至彭蠡與南北合始得  
稱中也韋昭註三江松江錢塘江浦陽江沈懷遠南  
越志廣信江始安江鬱林江亦為三江是又三江之

在吳越者

江之別又有郢江

任豫益州記亦曰涪江曰湔水在蜀與洛水合

汶江

益州記源出王輪阪下

墊江

崔鴻西京記水經仇池過晉壽山沱渠始號墊江至

巴郡入大江

弱柳江

緣江記西江別支

浙江

山海經出三天子都地理志出新安縣南蠻中顧  
野王云發源東陽新安之間不與岷江相涉至錢塘  
入海

松江

劉澄之揚州記吳縣有松江自吳入海

濟之出王屋也

風俗通濟水出常山房子縣贊皇山此別是一水應氏以為流入河南之濟者非是

初名沆水東出溫縣西北始名濟水又東南流當鞏縣之北而南入河與河並流過成臯

晉志濟自大伾入河與河水鬪而東流

溢出為滎水東流過陽武及封丘縣北又東過宛朐縣南至定陶縣南又東北流與河水會東至乘氏縣西分



而為二其一東北流入鉅野澤過壽張西與汶水合又  
北過穀城縣西又東北過盧縣北過臨濟縣南又東北  
經樂安縣南而入海其一東南流過昌邑縣北金鄉縣  
南至方輿為荷水過沛縣東北至下邳而入淮淮之出  
桐栢也

山海經淮水出餘山餘山在朝陽東義鄉水經淮水  
出南陽平氏縣胎簪山東北過桐栢山

其源初則涌出復潛流三十里然後長驚東北經大復

山從義陽郡北東過江夏平春縣北又東過新息縣南  
期思縣北至原鹿縣南與汝水合又東過廬江安豐縣  
與決水合東北至九江壽春縣東與潁水合壽春縣北  
與淝水合又東至當塗縣北與渦水合東北至下邳淮  
陰縣與泗水合東至廣陵淮浦縣而入海

水經

八流亦出名山渭出鳥鼠

水經註渭水出首陽山渭首  
亭南谷山在鳥鼠山西也

漾出嶠冢

禹貢嶠冢導漾東流為漢又為沔水所謂沔漢者也

山海經漢出鮒嵎山

洛出熊耳

水經洛水出上洛縣謹舉山東逕熊耳山

潁出少室

地理志出陽城縣陽乾山

汝出燕泉

水經出梁縣勉鄉西天息山地理志出高陵山亦言  
出南陽魯陽縣大孟山又言出弘農盧氏縣還歸山

泗出陪尾

山海經泗水出吳東北水經出魯下縣北山地理志  
出濟陰乘氏縣水經註出下縣故城東南桃墟西際  
阜俗謂之媯亭山陪尾蓋斯阜矣

溜出月台

山海經陽山留水出焉而南流注於河

沂出泰山

博物志

水經出泰山蓋縣艾山康成云出沂山亦或云臨樂

山淮南子何謂六水河水赤水遼水黑水江水淮水  
周職方氏掌九州州有川浸冀州其川漳水

水經濁漳水出上黨長子縣發鳩山

其浸汾潞

水經汾水出太原汾陽縣北管涔山

并州其川虜池嘔夷其浸涑易幽州其川河沛獮養其  
浸菑時青州其川淮泗其浸沂沐兗州其川河沛其浸  
盧維豫州其川滎雒其浸波澨揚州其川三江其浸五湖

荊州其川江漢其浸潁湛雍州其川涇汭其浸渭洛

周禮

中古之地但有九州禹治水作貢亦因其舊曰冀州

三面

距河兗河之西雍河之東豫河之北濟河惟兗州

東南距濟西北距河海岱惟青州

東北至海西南距岱海岱及淮惟徐州

東至海南至淮海惟揚州

北至淮東南至海荆及衡陽惟荊州

東距南條荆山之陽荆河惟豫

州西南至南條華陽黑水惟梁州

東距華山之南黑水西

河惟雍州

西距黑水東距西河

所謂九州攸同是也及舜即位以

冀青地廣分冀為幽并

分冀東恒山之地為并州東北醫無閭之地為幽州

分青

為營

分青之東北  
遼東為營州

所謂肇十有二州是也

尚書漢書  
連洪水天下

分絕為十二州使禹治  
之水土既平更制九州

既而復為九州殷時九州有幽營無青梁

爾雅郭璞  
註蓋殷制

周時九州有幽并無徐梁

周禮

輿地志周成王時以徐梁合之於青雍分冀州為幽

并河圖九州殊題水泉剛柔各異青徐角羽集寬舒

遲人聲緩其泉酸以鹹荆揚角徵會氣漂輕人聲急

其泉酸以苦梁州商徵接剛勇漂人聲騫其泉苦以

辛究豫宮徵合平淨有慮人聲端其泉甘以苦雍冀  
合商羽端駃烈人聲捷其泉辛以酸

周

周地柳七星張之分野也有河南雒陽穀成平陰偃師  
鞏緱氏周人巧偽趨利貴財賤義高富下貧憚為商賈

不好仕宦

漢書

博物志周在中區西阻嶠谷東望荆山南面少室北  
背太嶽三河之分雷風所起四險之國也



# 秦

秦地於天官東井輿鬼之分野也其界自弘農故關以西京兆扶風馮翊北地上郡西河安定天水隴西南有巴蜀廣漢犍為武都西有金城武威張掖酒泉敦煌又西南有牂柯越雋益州其民有先王遺風好稼穡務本業有鄠杜竹林南山檀柘號稱陸海為九州膏腴

漢書

博物志秦前有藍田之鎮後有胡苑之塞左嶠函右

隴蜀西通流沙險阻之國也

魏

魏地甯觶參之分野也其界自高陵以東盡河東河內  
南有陳留及汝南之召陵潁疆新汲西華長平潁川之  
舞陽鄆許偃陵河南之開封中牟陽武酸棗卷俗剛強  
多豪傑侵奪薄恩禮好生分河東土地平易有鹽鐵之

饒

漢書

博物志魏前枕黃河背漳水瞻王屋望梁山有藍田  
之寶浮池之淵

韓

韓地角亢氐之分野也得南陽郡及潁川之父城定陵  
襄城潁陽潁陰長社陽翟郟東接汝南西接弘農得新  
安宜陽土陜而險山居谷汲其俗夸奢上氣力好商賈  
漁獵藏匿難制御也

漢書

趙

趙地昴畢之分野也得趙國北有信都真定常山中山  
又得涿州之高陽鄭州鄉東有廣平鉅鹿清河河間又

得渤海郡之東平舒中邑文安東州成平章武河以北也南至浮水繁陽內黃斥邱西有太原定襄雲中五原上黨丈夫相聚游戲悲歌忼慨起則椎剽掘冢作姦巧

多弄物

漢書

博物志趙東臨九州西瞻恒嶽有沃瀑之流飛壺井陘之險至於潁陽涿鹿之野

燕

燕地尾箕分野也東有漁陽右北平遼西遼東西有上

谷代郡雁門南得涿郡之易容城范陽北新城故安涿  
縣良鄉新昌及渤海之安次樂浪玄菟亦屬焉其俗愚  
悍少慮輕薄無威亦有所長敢於急人

漢書

博物志燕却背沙漠進臨易水西至君都東至於遼  
長蛇帶塞險固之國也

### 齊

齊地虛危之分野也東有菑川東萊琅邪高密膠東南  
有泰山城陽北有千乘清河以南渤海之高樂高城重

合陽信西有濟南平原齊地負海舄鹵而通魚鹽之利  
其士多好經術矜功名紆緩濶達而足智其失夸奢朋  
黨言與行謬虛詐不情

漢書

魯

魯地奎婁之分野也東至東海南有泗水至淮得臨淮  
之下相睢陵僮取慮地愜民衆頗有桑麻之業亡林澤  
之饒俗儉嗇愛財趨商賈好訾毀多巧偽喪祭之禮文  
備實寡然其好學猶愈於他俗

漢書

博物志魯前有淮水後有岱嶽蒙羽之向洙泗之流  
大野廣土曲阜尼丘

宋

宋地房心之分野也得沛梁楚山陽濟陰東平及東郡  
之須昌壽張其後得山陽陳留其民厚重多君子好稼

穡惡衣食以致畜藏

漢書

博物志宋北有泗水南迄淮過有孟諸之澤碭山之  
塞

衛

衛地營室東壁之分野也得東郡及魏郡黎陽河內之  
野王朝歌後徙濮陽其俗剛武上氣力其失奢靡嫁取

送死過度

漢書

博物志衛南跨於河北得洪水南過漢上左通魯澤

右指黎山

楚

楚地翼軫之分野也得南郡江夏零陵桂陽武陽長沙



及漢中汝南後東徙於陳有江漢川澤山林之饒民食  
魚稻以漁獵山伐為業信巫鬼重淫祀

漢書

博物志楚後背方城前及衡嶽左則彭蠡右則九嶷  
有江漢之流險阻之國也

吳

吳地斗之分野也得會稽九江丹陽豫章廬江廣陵六  
安臨淮其民好用劍輕死易發東有海鹽章山之銅三  
江五湖之利豫章出黃金然堇堇物之所有取之不足

以更費江南卑濕丈夫多夭

漢書

博物志吳左洞庭右彭蠡後濱長江南至豫章水戒

險阻之國

粵

粵地牽牛娶女之分野也得蒼梧鬱林合浦交趾九真


南海日南後滅吳兼并其地

漢書

博物志東越通海處南北尾間之間三江流入南海

通東治蒿海深險絕之也南越之國與楚為鄰五嶺

已前至於南海負海之邦交趾之土謂之南裔



尚史卷九十六